

e san Pieri la tirave sù; ma lis altris ànimis c' a erin intòr di je comenzerin a tacàgisi intòr, sperànt di podé saltá fûr das penis ance lor. La mari di S. Pieri no oleve che nissùn altri si salvàs cùn je; e 'a dè quindi une gran sgurlade par fá colá lis ànimis, ma la pìzzule rieste di ài si rompè, e je cun dutis lis altris ànimis c' a veve intòr a plombà a fons di cia-dal-diaul, d' indulà che so fi nol podè plui tiràle sù.

E quan' che un l' à invìdie dal ben dai altris, cumò i disin: Invidiôs come la mari di san Pieri.

V. OSTERMAN.

Corpus Dòmini.

Cheste matine i fruz, ciacaruzzànt
'e son lâz in tal bosc a cirí fras'cis
e lis frutis a cuei flors par i prâz;

po ju àn spandûz in tal país; pes stradis,
barufansi tra lor par sedi prins,
corìnt, sudansi, disinsi di dut.

Cumò sglinghigne la ciampane pìzzule
e il campanòn cun chel vosòn al vise
che jessin i cantórs cul Sacramènt.

I standàrz, biel stargiâz, in tal soreli
'e mandin lamps, e come une gran magne
si slunge vie pai ciamps la prucission.

Signór, Signór, si slunge pe campagne
la prucission, domandanti la ploè
e il serèn, il bon an e il cur contènt.

Sfloris tai ciamps, e ven sù par il cur
une voe di fá ben, di benedí
dunquant, e di lá vie drèz e sigùrs.